

Bubali ta celebra 45 aniversario awe

ORANJESTAD (AAN)- Ayera tardi **DIARIO** a ricibi for di Max Wolff Presidente di Bubali Sport Club un comunicado den nomber di direc-

tiva di Bubali cu ta bisa cu awe ta exactamente 45 aña pasa cu Bubali Sport Club a worde funda pa varios persona di e bario di Bubali.

Tabata riba un Diadomingo prome, bao di un palo di Watapana na Bubali, un idea a bini pa dilanti pa lanta un team di bala. E personanan tabata: Srs. Joseph Gomez (q.e.p.d.), Agustin Semeler, Juan Tromp (q.e.p.d.), Shito Ridderstap, Cristobal Tromp (q.e.p.d.), Crispin Eckmeyer, Jose Eckmeyer (q.e.p.d.) Marco Tromp (q.e.p.d.), Nicolaas Tromp,

Vicente Tromp (q.e.p.d.) Camilio Tromp, Chebe Figaroa y algun joven mas y mayoria di e personanan aki tabata traha na Eagle.

Recordando historia di Bubali nos lo ripara un liña cu ta core poco poco sigur y cu progreso. Y tur esaki tabata cu e gran ayudo di nos miembronan cu a haci un gran esfuerzo pa engrandese y ensancha e progreso aki. Atrobe nos no mester lubida un di e pilarnan cu den e tempo malo a lucha cu e team cu solamente 12 hun-

gador incluyendo su mes y esey ta Sr. Vicente Henriquez cu na aña 1954 pa 1956 a lucha duro pa mantene e team na bida. Na aña 1957 varios joven e.o. Chin Franken, Frans Kelly, Mundo Eckmeyer hunto cu Vicente y Gustin Semeler a reorganiza Bubali y e prome tarea tabata pa lanta e team di junioren y for

di e tempo ey e junioren a keda tuma parti na tur campeonato di A.V.B. y na hopi ocasion a titula campeon e.o. for di aña 1974 te cu 1977 sigui y te awe ta entre e mejornan di Aruba.

Bubali tabata campeon di Aruba na 1975 y na 1967 y 1986 tabata sub-campeon. Desde cu Directiva di A.V.B. a cuminsa cu e sistema nobo pa clasifica na aña 1975 ta solamente na tres ocasion Bubali a keda afor. Tambe Bubali a hunga contra tur e top teamnan di Curacao, entre otro Subt, Jong Holland, Jong Colombia, Scherpenheuvel, Sithoc y Veendam y tambe contra varios top team di Surnam e.o. Transvaal.

Actualmente e Organizacion di Bubali ta consisti di 6 team esta, 2 team di Lifida, Aspirant menor, Junioren, Reserve-team y division Honor. Pues aki nos ta mira cu e Organizacion semper a produci su mes hungadornan.) bon material tambe cu ta competi entre e mejornan di aruba)

Actualmente nos tin un comision masha activo cu ta traha cu e hungadornan di Lifida y Aspirant. E comision ta consisti di Srs. Benni Figaroa, Doe Rodriguez, Eric Escalona, Sra. Maria Tromp y Sra. Rita Figaroa. Sr. Humphrey Gomez tambe ta haciendo un bon trabao y ta lider di hungadornan di reserve.

E directiva di Bubali ta como lo siguiente. Presidente Max Wolff, Vice Presidente Jose Figaroa, Secretario Tilo Tromp, segundo secretario Juancito Giel, Tesorero Sonny Tromp, segundo tesorero Chenco Figaroa, Comisarianan



Mundo Eckmeyer y Padu Geerman, entrenador Kiki Tromp. E aña aki nos no lo celebra manera den pasado ora a recorda 25,30,35 y 40 aña di existencia y esaki ta debi cu nos tin cierto compromiso pa cumpli y tambe cu nos lo sigui traha ariba e Clubhuis cu tine

varios aña para y cu ayudo di nos miembronan nos lo logra.

Finalmente e comunicado ta bisa, for di aki, na nomber di directiva, mi kier extende caluroso pabien na tur cu a funda, forma y ta formando parti di Bubali y na tur cu di un of otro manera a coopera pa

trece nos caminda nos ta awe y cu boso apoyo nos lo marcha pa dilanti.

DIARIO kier a desea Bubali Sport Club hopi aña mas di existencia, y pabien na tur miembro di directiva, hungador, miembro y fanaticonan di e team.